

M119: Die Jüngere Judith

- 0,1 Nu uernemit ir lieben lute .
0,2 ich wil iv gerne sagen ze deute .
0,3 eine rede uile wnesame .
0,4 da muget ir gerne denchen ane .
0,5 der ne solde mich nivht erdriezen .
0,6 mahte ich ir geniezen .
0,7 uor den nidaeren .
0,8 die uil ofte phelegent ze besweren .
0,9 des mannes muot .
0,10 der dem liute ivht ze guote getovt .
0,11 mit siner guoten lere .
0,12 des sint si spottere .
0,13 daz si phelegent ze schelten .
0,14 daz mugen si bringen selten .
0,15 und en lazent iz doch ane nit nieht .
0,16 dar umbe movzen si uerlisen daz ewichliche lieht .
0,17 Ich wil iv sagen uon unserm heilaere .
0,18 wie manige lere .
0,19 er uns uor hat getragen .
0,20 die uns uil wole mugen behagen .
0,21 [...] [...]
0,22 an dem ebreiskem diete .
0,23 so ne mohte im nivt leides ergan .
0,24 svver siv mit arge wolde bestan .
0,25 der muose des en allen gahen .
0,26 wol grozen schaden enphahen .
0,27 also an disem liede .
0,28 ist uil guot schin .
0,29 wie er siv beschirmte .
0,30 mit einem bloden wibelin .
0,31 unde mit welcher schande .
0,32 er nabuchodonosors her sande wider ze lande .
0,33 daz ne wirt ivch nivth uerdaget .
0,34 iz ne werder iv allez gesaget .
0,35 swenne auer si gecherten .
0,36 uon dem . ir trehten .
0,37 daz si sine- gebote niene waren undertan .
0,38 daz movse sa an ir schaden gan .

0,39 so wrden si sa uon den heiden .
0,40 bedwngen mit manigen leiden .
0,41 unze si danne getaten widerchere .
0,42 zu ir rehten schepfere .
0,43 so half er danne drate .
0,44 uz maniger slahte note .
0,45 da laze wir dise rede stan .
0,46 unde grife wir daz liet ane .
0,47 Artaxersis ein chunic her unde rich .
0,48 der saz gewelticlichen .
0,49 ze perse in sinem riche .
0,50 ovch dienten im da bi . einiv livte
0,51 div heizent medi .
0,52 dar zov habet er bedungen .
0,53 manige heideniske zungen .
0,54 daz si im den zins geben .
0,55 unde s in ze herren iaehen .
0,56 er zimberot ovch eine stat .
0,57 nach siner chunichlichen craft .
0,58 diu was so wndernchreftich .
0,59 daz ir niender neheiniv was gelich .
0,60 div was egbatanis geheizen .
0,61 da was manich heidenisker man inne gesezen .
0,62 Dar umbe giench ein burchmure uile breit .
0,63 manich quaderstein was dar an geleit .
0,64 daz ne was ovch nieth uermiten .
0,65 da ne laegen ane steine wehe gesniten .
0,66 mit maniger slahte wnder .
0,67 die turne sazte er dar under .
0,68 diu mure was sibenzich chlafter hoch .
0,69 also sagent uns diu buoch noch .
0,70 si was uil gereite .
0,71 drizich chlafteren breite .
0,72 da stuont ufe uil manich zinne .
0,73 die turne dar inne .
0,74 die waren cehenzich clafter hoch .
0,75 als iz der riche chunich gebot .
0,76 in waren diche die wende .
0,77 zuainzich chlafter uon nidene unze obene an daz ende .
0,78 da saz er inne mit eren .
0,79 mit manigem heideniskem herren .
0,80 die im alle waren undertan .
0,81 er habete manigen heidenisken man .
0,82 an der stunde zesamene braht .
0,83 uil michel was deu sin chraft .
0,84 daz muose auer allez zegan .
0,85 duo er sin got niene wolde sehen an .
0,86 noch er sin dem niene wolde lob geben .

0,87 uon dem er da habete daz leben .
0,88 Daz stovnt also ze ware .
0,89 unze an dem zuelftem iare .
0,90 daz er also chvnichlichen was gesezzen .
0,91 er wolde hovch nivh wizzen .
0,92 daz iemen so geweltich ware .
0,93 daz sage ich ev ze ware .
0,94 dov was ein chunich ze ninniue gesezzen .
0,95 der was nabuchodonosor geheizzen .
0,96 der habete ovch witen gewalt
0,97 un- uuorte manigen helt balt .
0,98 sin lant hiez assiria .
0,99 er habt gewonnen da .
0,100 uil guoter chnehte .
0,101 er wolde im sa mite uechten .
0,102 nu riten si zesamne .
0,103 michel was ir menige .
0,104 michel wart daz walbluot .
0,105 da gelach manich man tot .
0,106 der ir deweders nie nicht genoz .
0,107 ne war daz daz er den lip da uerlos .
0,108 da starb manich ros unde man .
0,109 nabuchodonosor den sich genam .
0,110 arfaxat der gueltige chunich sa .
0,111 der gelach tot da .
0,112 Ich wil iv sagen ze ware .
0,113 wa si zesamne chomen .
0,114 swie ir uir niene muget erchennen .
0,115 doch wil ich iv die stete nennen .
0,116 ragau heizet ein michel uelt .
0,117 da sluogen si uf ir gezelt .
0,118 zuisken zwain micheln wazern .
0,119 daz eine ist eufrates geheizen .
0,120 daz ander heizet tygris .
0,121 da uahten si gewis .
0,122 an einem breitem uelde .
0,123 iadasan heizzet daz selbe .
0,124 an eines andern chuniges marche .
0,125 da wart geuohten daz uolchwich also starche .
0,126 der was geheizen erioch .
0,127 also sagent uns div buoch . noch .
0,128 daz sagen wir iv ze dute .
0,129 der was chunich elicorum der lvte .
0,130 Duo nabuchodonosor also wol gelanch .
0,131 daz er des chuniges riche alliv betvanch .
0,132 duo gehocht er sin gemuote .
0,133 mit grozzer ubermuote .
0,134 er begunde boten ze senden .

0,135 ze allen den landen .
0,136 die er mohte beriten .
0,137 uil wnderlichen witen- .
0,138 daz si im den zins gaeben .
0,139 unde s in ze herren iahen .
0,140 herisk was daz sin gebot .
0,141 er wol daz si in an beten als er iz waere got .
0,142 dar umbe ward er gescehndet .
0,143 si worden alle im selben wentlichen wider gescendet .
0,144 Nu wil ich iv nennen die stete unde dev lant .
0,145 dar er sine boten habte gesant .
0,146 cilicia heizet ein lant .
0,147 dar habete er sinen boten gesant .
0,148 damaske heizet ein lant .
0,149 dar ovch der bote gesendet wart .
0,150 ein berch heizet lybanus .
0,151 dar chovm ovch diu botschaft alsus .
0,152 die da uuorsten waren .
0,153 daz si im den zins gaeben .
0,154 die sicient in carmelo .
0,155 ze den sante er ovch also .
0,156 daz arme unde riche .
0,157 im den zins sanden geliche .
0,158 sine boten chomen ovch dar .
0,159 z einer stete heizet cedar .
0,160 in galylea- .
0,161 die selben botschaft man uerna- .
0,162 daz ist ein chreftich lant .
0,163 dar wart diu selbe botschaft ovch gesant .
0,164 esdreton heizet ein geulde breit .
0,165 dar chom div selbe botschaft daz was in innerclhichen leit .
0,166 ein stat heizet samaria .
0,167 die botschaft uraiste man ovch da .
0,168 uon babylonia .
0,169 unze uber die iordanach .
0,170 chom des chuniges botschaft sa .
0,171 unz hin ze hirlm . wart gesait .
0,172 des richen chuniges toleheit .
0,173 iesse heizet ein lant .
0,174 dar wart deu botschaft gesant .
0,175 unze in ethiopia- .
0,176 des chuniges botschaft man uernam .
0,177 den allen was uil leit .
0,178 des selben chuniges tolheit .
0,179 si sanden im mit sachnden .
0,180 sinen boten heim ze lande .
0,181 unde ane aller slahte ere .
0,182 des engulten si dar nach uil sere .

0,183 Dov der riche chunich uerna- daz .
0,184 daz im hine wider enboten was .
0,185 iz was im uil unwert .
0,186 er sprach iz muose rechen sin swert .
0,187 [...] [...]
0,188 er suuor bi sinem riche .
0,189 an dem drichehten iare .
0,190 daz er geszsenet het ze ware .
0,191 da sprach er sinen hof du .
0,192 da lat er die uuorsten zu .
0,193 herzogen unde grauen .
0,194 alle die di im me riche waren .
0,195 unde ander manige helde .
0,196 die chomen ze dem gesemde .
0,197 armen iovch die uuorsten .
0,198 die wol uehten getorsten .
0,199 die na- man alle an den rat .
0,200 der chunich siv gemeinichen bat .
0,201 daz in sine wende waere laeit .
0,202 er wolde in dar umbe iemer sin gereit .
0,203 ze allen ir noten .
0,204 si sprachen iz gerne taeten .
0,205 der chunich siv du innen brahte .
0,206 wes er im gedahte .
0,207 daz elliv div lant .
0,208 wolde bedvingen in sinen gewalt .
0,209 Dov die worsten uernamen sin gemovte al .
0,210 [...] [...]
0,211 iz geuil in innerclhichen wol .
0,212 si ware- alle uil gereit .
0,213 ze rechen des chuniges leit .
0,214 unde siv bedvingen .
0,215 al nach sinen willen .
0,216 div rede geuiel dem chunige wol .
0,217 michel wart der herschal .
0,218 er besamte sich grozlichen .
0,219 uz allen sinen richen .
0,220 si waren alle gereit duo .
0,221 er gab in einen uaener der zuo .
0,222 der daz her solde leiten .
0,223 uber marche die breiten .
0,224 den si alle an saehen .
0,225 unde im maistershefte iahen .
0,226 Der was geheizen holofernes .
0,227 der chunich gedaht im des .
0,228 daz in dem lande ne waere .
0,229 ein man so richer noch so herer .
0,230 der daz her baz mohte belaeiten .

0,231 unde im div lant bereiten .
0,232 ze sinem dienste .
0,233 er was im ovch der liebiste .
0,234 er was ein helt uil frumich .
0,235 er wart sa des hers chunich .
0,236 si dienten im mit eren .
0,237 unde hiezen alle ir herren .
0,238 er was ein helt erlich .
0,239 zuo im sprach der chunich her unde rich .
0,240 “holofernes min uil lieber man .
0,241 du scolt uz an div riche uarn .
0,242 du bedvinch div algeliche .
0,243 gegen osteriche .
0,244 unde iedoch allermæiste div lant .
0,245 die mir minen boten wenllichen habent wider gesant .
0,246 unde bedivnch bediv geliche .
0,247 die stete iovch div chunichriche .”
0,248 Also er die rede uerna- .
0,249 hei wie schiere er uf chom .
0,250 er uorderot di herren .
0,251 daz si im hulfen ze sines herren eren .
0,252 er gewan manigen chvonen man .
0,253 daz er wart ureissam .
0,254 ich uuul iv sagen ze ware .
0,255 zwie uil iz gahtet waere .
0,256 uns saget daz bovch er hiete gewnnen sa .
0,257 cehnzhic unde zawanincich tulent uenden da .
0,258 die waren alle gereite .
0,259 zov der heruerte .
0,260 mit ir wichgeziuge .
0,261 daz ich iv niene livge .
0,262 er habete dannoch hers mere .
0,263 zov sines herren ere .
0,264 zwelf tulent guoter chenehte .
0,265 die wol getorsten uehten .
0,266 die alle geschuze worten .
0,267 unde des hers hovten .
0,268 michel was des hers schal .
0,269 er worte olbenten ane zal .
0,270 si mohten chume haben waeide .
0,271 die trugen daz ir getreide .
0,272 si uuorten uil waegene .
0,273 mit spise geladene .
0,274 hyrze unde hinden .
0,275 si uuorten uil rinder .
0,276 schaf unde geize .
0,277 tinchel unde waeize .
0,278 uon silber unde uon golde .

0,279 uuorte er swas so er wolde .
0,280 daz gab im der chunich ane maze .
0,281 er vrvomte in uf die straze .
0,282 daz er e ivht widersunne .
0,283 e er div lant elliv gewnne .
0,284 Div uelt waren alle bedaht .
0,285 uon des michel hers chraft .
0,286 daz sage ich iv ze ware .
0,287 sa-m iz allez haberscrechen uol waere .
0,288 duo si geuuoren uzer assyria .
0,289 dvo chomen si sa .
0,290 da si wnden berge hohe .
0,291 des landes augee .
0,292 da chert er si ze der winstern hant .
0,293 ze cilicia in daz lant .
0,294 si stiften rovb unde brant .
0,295 ir chastel si gewnnen .
0,296 die stete si bedwngen .
0,297 si brachen in ir ueste .
0,298 si waren in laeide geste .
0,299 si ne mohten in nevht gestriten .
0,300 si muosen in durch noth entwichen .
0,301 si bedwngen siv einer micheln chraft .
0,302 si worden alle zinshapht .
0,303 si berovbten eine uil riche stat .
0,304 das si mere niender wnden ir gat .
0,305 meluht was der ir name .
0,306 si Worten micheln rovb dane .
0,307 Div uil michel herchraft .
0,308 div cherte an alle die lantschaft .
0,309 div in engegenwrde was .
0,310 ze ware sage ich iv daz .
0,311 daz waren elliv div lant .
0,312 div iv nu werdent uor benant .
0,313 ein chunichriche heizet tharsys .
0,314 daz rovbten si gewis .
0,315 ich wane daz si div ismaheles chint .
0,316 ovch rovbten die engegene der woste gesezen sint .
0,317 hinn osten rovpden si ovch .
0,318 chelmon heizet ein lantuolch .
0,319 si uuoren uber ein wazer .
0,320 eufrates ist iz geheizen .
0,321 unde rovbten ein lant da .
0,322 daz heizet mesopotamia .
0,323 si brachen in ir ueste .
0,324 si waren in laeide geste .
0,325 unze an daz wazer mambre .
0,326 dar en cho- nie dechein her so grozez e .

0,327 un daz an daz oster mere .
0,328 uuor daz creftige her .
0,329 si bedwngen div lant da .
0,330 unze an daz mere uon cilicia .
0,331 Holofernes der chreftige man .
0,332 der uaht div riche elliv an .
0,333 si ne mohten in niht widerstan .
0,334 si muosen im werden undertan .
0,335 iafeth unze an daz ende .
0,336 daz bedwang er mit michelre menige .
0,337 daz was hinn osten ovch gelegen .
0,338 di movsen sinem herr,en ovch den zins geben .
0,339 er uuorte uon madiam .
0,340 uil manich wib un- man .
0,341 die er hete geuangen .
0,342 er wolde siv uuoren danne .
0,343 er uuorte micheln ruob danne .
0,344 an dem livte wart michel mort begangen .
0,345 si werten sich mit grimme .
0,346 er mohte siv ubele gewinnen .
0,347 des churn si alle den tot .
0,348 die im niene dienten ane not .
0,349 die er mit uolchwige gewan .
0,350 ube die muose sin zorn gan .
0,351 Holofernes der herre .
0,352 daz her hiez er hine ze damasce chere- .
0,353 daz was in dem snite .
0,354 duo wolde er in mit uehten .
0,355 er uerbrante in ir chorn .
0,356 er wolde si waeren schiere uerlorn .
0,357 ir wingarten er duo brante .
0,358 e er uuor die burch rante .
0,359 er woste allez daz lant .
0,360 michel wart der herbrant .
0,361 in uorhten elliv div lant ze ware .
0,362 die dar umbi belagen .
0,363 si werten sich mit chrimme .
0,364 er mohte siv ubel gewinnen .
0,365 doch ne mohte im nevt widerstan .
0,366 si movsen im werden undertan .
0,367 Man ureiste witen daz .
0,368 daz im niemen gesaz .
0,369 si movsen alle geliche .
0,370 holoferne entwehen .
0,371 er wart mere uil fram .
0,372 im movse durch not entwichen uil manich herrman .
0,373 si santen im ir botschaft .
0,374 si wolden im wesen zinshaft .

0,375 im unde sinem herren .
0,376 dienen iemer mere .
0,377 “du scolt dinem zorne entwichen .
0,378 unde entlip unsern richen .
0,379 wir wellen dem chunige nabuchodonosor gerne dienen .
0,380 e wir den lip uerliesen .
0,381 wir wellen im sin undertan .
0,382 wir wellen in z eine- got haben .
0,383 wir bieten dich unser dienst ane . herre nu chum uns uridesam .”
0,384 Also er daz uerna- .
0,385 die berge er rumen began .
0,386 da er mit dem here gesezzen was .
0,387 ze ware sage ich iv daz .
0,388 dov bereit er die stete unde div lant .
0,389 die im ir boten habeten gesant .
0,390 unde behabete siv sinem herren .
0,391 [...] [...]
0,392 si uuoren im alle engegene .
0,393 mit micheler menige .
0,394 mit silber unde mit golde .
0,395 si gewunnen sine hulde .
0,396 mit vigelen iovch mit gigen .
0,397 mit rotten iovch mit liren .
0,398 mit haerphen . iovch mit springen .
0,399 mit tanzen iovch mit singen .
0,400 chomen si im engegene .
0,401 unde fristen ir leben e .
0,402 swie si ime gaeben uil gvot .
0,403 si ne mohten im nivht gesenften sinen muot .
0,404 er ne braeche in ir stete unde ir gotshus .
0,405 ir apgot warf er dar vz .
0,406 Nu uernemt waz er dar ane rach .
0,407 daz er in ir gotshus brach .
0,408 daz was des chuniges gebot .
0,409 daz er alle ir got .
0,410 uil gar zeuuorte .
0,411 unde siv an ine cherte .
0,412 daz si muosen beten an in .
0,413 wande er wolde got hie n erde sin .
0,414 [...] [...]
0,415 Holofernes der durchreit div lant .
0,416 unde bedwanch siv elliv in sines herre gwalt .
0,417 div lant habet er beduvngen da uberal . danne uur er in siriam sobal .
0,418 so heizet ein lant daz lit uil uram .
0,419 danne uuor er in apamiam .
0,420 so heizet ein lant lit ovch da .
0,421 daz bedwang er ovch sa .
0,422 dov chom der helt uile uram .

0,423 in daz sant mesopotamiam .
0,424 duo bedwang er ovch idumeam .
0,425 duo chom er z einer stete da .
0,426 div was geheizen gabaa .
0,427 ze ware sage ich iv daz .
0,428 holofernes drizich tage da saz .
0,429 in siner herschefte .
0,430 da geintrifte er daz her in siner chrefte .
0,431 wande er grozze helfe hete gewnnen .
0,432 uon den landen die er hete bedwngen .
0,433 Dvo uernamen iz sa .
0,434 israhelite die da waren gesezzen iudea .
0,435 si sorgeten uile harte .
0,436 ze siner zuouerte .
0,437 man sagete in uil michel heise .
0,438 si waren in grozer freise .
0,439 si uorhten er chome ze ierusalem sa .
0,440 unt zebreche die sam er habete getan alswa .
0,441 unde zebraeche daz ir gotshus .
0,442 unde name daz ir heilictu- dar uz .
0,443 sam er den heiden habete getan .
0,444 si digeten got uast an .
0,445 daz er durch sine govte .
0,446 sin livt uor den heiden beschirmote .
0,447 si sanden ir boten sa dan .
0,448 in die stat samaria- .
0,449 ir botschaft chovm ovch duo .
0,450 in die stat ze iericho .
0,451 si besamnoten sich engegen den leiden gesten .
0,452 die berge si begunden si uesten .
0,453 si bemuoreten ir stete groze .
0,454 si wolden sich wern ir ungenoze .
0,455 si rusten siv wol mit spise .
0,456 si habeten ratgeben wise .
0,457 Heliachim der wise .
0,458 der iuden biscalp riche .
0,459 der sande brieue manige .
0,460 allenthalben in daz lant danne .
0,461 ze den lantpurgen grozen .
0,462 ze den ir husgenozen .
0,463 ein stat heizet esdrelon .
0,464 dar des biscalues brief chom .
0,465 div stet engegen einem geulde breit .
0,466 er hiez siv also wesen gereit .
0,467 daz si di berge uiengen .
0,468 da die engen wege durch giengen .
0,469 hin ze ierusala- .
0,470 swa si die mohten uersten .

0,471 daz man in daz erwerte .
0,472 swa si dar mohten haben dechein geuerte .
0,473 Die iuden die taten daz .
0,474 also in uon houe geboten was .
0,475 si besazten die berge .
0,476 si wolden sich weren gerne .
0,477 ruoften al geliche .
0,478 daz siv got genaedechlichen .
0,479 durch sine guote getroste .
0,480 unde siv uon den heiden erlost .
0,481 sie uasten al geliche .
0,482 arme unde riche .
0,483 bediv chint unde wib .
0,484 daz siv got erhorte enzit .
0,485 e si worden zeuuoet .
0,486 unde ir gotshus zestoret .
0,487 daz si ivht muosen dienen .
0,488 den heiden uil bosen .
0,489 daz ierusalem ivht worde zeuuoet .
0,490 nochc ir heilichtv- zestoret .
0,491 si baten alle geliche .
0,492 unde giengen wllin ze liche .
0,493 daz er in uriste daz leben .
0,494 daz si den heiden ivht worden ze spote gegeben .
0,495 Heliachim der gotes ewart .
0,496 der troste siv uil harte .
0,497 er hiez siv an ir gebete stan .
0,498 si ruoften uaste got ane .
0,499 an aller slahte zwiuel .
0,500 so uberwanden si den tieuel .
0,501 er mante siv dar ane .
0,502 wie die heiden moysen den heiligen man .
0,503 an wolden uehten .
0,504 duo half im unser trehten .
0,505 daz er ane schilt unde sper .
0,506 uberwant ein uil michel her .
0,507 niewan mit dem gebete .
0,508 daz er emzichlichen tete .
0,509 daz siv got sante eine uorten an .
0,510 daz si alle entrunnen dane .
0,511 da gedenchet uil wol ane .
0,512 so hilfet er iv nu sam .
0,513 si uolcten sinem rate .
0,514 ir gebete was ze gote uil stete .
0,515 in ne wart nie getan solich uorhte .
0,516 daz die ewarte .
0,517 hieten herin gwant an .
0,518 so si ze gotesdienste solden gan .

0,519 unze an die selben not .
0,520 si uorhten harte den tot .
0,521 Dov wart drate chunt getan .
0,522 holoferne dem chuonen man .
0,523 im wolden die iuden widerstan .
0,524 si ne wolden im nivt werden undertan .
0,525 si hieten geuangen die bergen .
0,526 si hieten die straze besezen .
0,527 unde hieten sich des uermezzen .
0,528 die wile si habeten daz leben .
0,529 si ne liezen in in ir lant niemer chom .
0,530 du begunde ze zurnen sere .
0,531 holofernes der herre .
0,532 er late dar sines herren man .
0,533 di der hieten uuorsten namen .
0,534 unde tet in die rede chunt .
0,535 un- hiez im ovch ze der selben stunt .
0,536 die herren dar gewinnen .
0,537 die er hete gewngen .
0,538 daz si im saiten ze ware .
0,539 wer daz livt were .
0,540 oder wie michel ir stete waeren .
0,541 des uragte er die herren .
0,542 obe si ivth chuniges habeten .
0,543 daz si im daz sageten .
0,544 wie si im getorsten so uersmahen .
0,545 daz si in niene wolden uridelichen enphahen .
0,546 mere den elliv div lant .
0,547 div er hete bedwngen in sines herren gwalt .
0,548 Dov ensprach iz achior .
0,549 der was herre eines livtes heizet ammon .
0,550 “wil du z uernemen herre .
0,551 ich wil dir s sagen ze ware .
0,552 ich wil dir nivht liegen .
0,553 noch dar an betriegem .
0,554 ich ne sag dir z ze dute .
0,555 uon dem selben livte .
0,556 nu ne la dir z nivht wesen zorn .
0,557 iz ist uon den chaldeis geborn .
0,558 si waren z erste in mesopotamia .
0,559 unze siv uertriben die chaldei da .
0,560 wande si ubergiengen ir gebot .
0,561 unde ne wolde nivht peten an ir apgot .
0,562 si erwelten in ein got .
0,563 unde gehielten des gebot .
0,564 der gwalt hat der himele .
0,565 unde der erde hie niedene .
0,566 ich wil iv sagen ze ware .

0,567 du wrden siben hungeriare .
0,568 du uuoren si in egyptu- .
0,569 also hiz siv ir got tuon .
0,570 da waren si ze ware .
0,571 uier hunderet iare .
0,572 da wohsen si so uaste .
0,573 daz siv niemen gezellen ne mohte .
0,574 uon egypto der chunich her .
0,575 der tet in menigev lait unde ser .
0,576 michel was ir wofen .
0,577 an ir got begunden si ruofen .
0,578 duo half er in drate .
0,579 uz micheler note .
0,580 Nu uernim mir uil lieber herre .
0,581 ich wil dir noch sagen mere .
0,582 du ersluch er daz egyptlant .
0,583 unze si se muosen lazen uz ir gwalt .
0,584 du woren si mit einem uil michelen here .
0,585 durch daz rote mere .
0,586 duo wolden si siv ergahen .
0,587 unde wolden siv bedvingen .
0,588 unde wider in ir dienst pringen .
0,589 du begunden si ulihen .
0,590 ir got half in schiere .
0,591 daz mere was in offen .
0,592 der wech wart in entlochen .
0,593 si begunnden dar durch ze gahen .
0,594 die egyptii wolden siv uahen .
0,595 si uuoren durch daz mere .
0,596 mit deme uil michelen here .
0,597 daz der ir uiande grunt .
0,598 daz ir deheiner nie bestunt .
0,599 der hin heim gesagete daz mere .
0,600 wi ez in ergangen ware .
0,601 Derre du daz uil michel herre .
0,602 chom durh daz rote mere .
0,603 duo uunden si eine wste da .
0,604 bi dem berge syna .
0,605 div ist so ureissam .
0,606 dar durch ne mohte chom niene mere dehein man .
0,607 da was daz wazer ture .
0,608 daz selbe daz si wnden daz was suore .
0,609 daz sin niemen mohte enbizen .
0,610 daz begunde in sa suozen .
0,611 si uuoren dar durch uierzich iar .
0,612 er gab in uon himele brot daz ist war .
0,613 swer siv mit ubele wolde bestan .
0,614 ane uechten gewnnen si in den sich ane .

0,615 ze ware sag ich iz iv .
0,616 ir got der uaht wor siv .
0,617 in ne mohte nivr widerstan .
0,618 die wile si in wolden sehen an .
0,619 swene auer si uon im gecherten .
0,620 unde einen anderen got erten .
0,621 so worden si gefangen unde erslagen .
0,622 sa muose iz gan an ir schaden .
0,623 also auer si gecherten an in .
0,624 so ne mohte in nivr wider sin .
0,625 Ich wil dir sagen mere .
0,626 uunf chunige here .
0,627 die ersluogen si drate .
0,628 mit ir gotes rate .
0,629 unde alle ir holden .
0,630 die urumten si zu der molden .
0,631 ir stet unde ir lant .
0,632 gewonnen si in ir gwalt .
0,633 daz sint herre div lant .
0,634 div si nu besezzten habent .
0,635 div gwan in der ir got .
0,636 die wile si habeten sin gebot .
0,637 du ne mahte in nivr misselingen .
0,638 want ir got ne wil dehein unreht minnen .
0,639 doh n ist sin nivht lange herre min .
0,640 daz si habeten uerlazen daz gebot sin .
0,641 duo wrden si zeuuoet .
0,642 unde ir gotshus zestoret .
0,643 nu sint si uon den sculden .
0,644 wider chom z ir gotes hulden .
0,645 si sint nivns chomen wider in ir lant .
0,646 uz der uiande gewalt .
0,647 unde besicent dise berge .
0,648 da habent si ueste burge .
0,649 unde hierlasmus wider geuangen .
0,650 da ist ir heilictuom inne .
0,651 min uil lieber herre .
0,652 nu uorske uil schiere .
0,653 uobe si wider sinen hulden ivht haben getan .
0,654 so sul wir se uechten an .
0,655 so maht u siv beduingen .
0,656 in dines herren gwalt bringen .
0,657 habent auer si wider sinen hulden nivht getan .
0,658 so ne muge wir si nivht bestan .
0,659 so ne muoge wir gestriten .
0,660 wider ir got den richen .
0,661 wand er beschirmet siv ze ware .
0,662 so worden wir geschendet lieber herre .”

0,663 Dov achior geswicte gar .
0,664 die holofernes helde begunden zurnen al .
0,665 si wolden in gerne erslagen haben .
0,666 daz er in die warheit muose sagen .
0,667 si sprachen wer der ware .
0,668 der des hiete gegeben .
0,669 daz si nabuchodonosor dem chunige mahten widersten .
0,670 uil blodez uolchelin .
0,671 daz ne mach ze der uehte dehein urvm sin .
0,672 daz auer achior daz erchenne .
0,673 “so wir in ir lant an gewinnen .
0,674 un- in benemen die berge .
0,675 unde in zebrechen die burge .
0,676 unde siv geuahan danne .
0,677 unde uuoren heim ze lande .
0,678 so muoz an aller slahte not .
0,679 achior chisen den tot .
0,680 so muoz man uraisken uerre .
0,681 daz nabuchodonosor si got der erde .
0,682 unde daz an sin gebot .
0,683 ne muge sin dehein ander got .”
0,684 Der herre holofernes .
0,685 der uermaz sich des .
0,686 daz daz sin wissagen .
0,687 im muose ergan al ce schaden .
0,688 uersaehe auer er sich da der warheit .
0,689 daz ne dorfte im nivht wesen lait .
0,690 er hiez uile harte gahen .
0,691 achior uahen .
0,692 er hiez in woren an den berch .
0,693 binden uuor der iuden burch .
0,694 du namen in die chnehte holofernis .
0,695 unde uuorten in uber daz uelt uil gwis .
0,696 unde bunden in obene an den berch .
0,697 mit wittahe uuor der iuden burch .
0,698 du si dar begunden nahen .
0,699 uz der stat begunden gahen .
0,700 schuzen unde slingare .
0,701 div wolden siv uahen ze ware .
0,702 si lizen in da gebunden .
0,703 un- cherten sich wider umbe .
0,704 unde ilten uile sere .
0,705 hine wider z ir herren .
0,706 Du die burgare uraisten daz .
0,707 daz ein man da gebunden was .
0,708 dov ilten si alle sa .
0,709 uz der stat ze bethulia .
0,710 si losten in uil schiere .

0,711 un- uragten in war umbe er dar gebunden ware .
0,712 du saite in achior daz .
0,713 war umbe er dar gebunden was .
0,714 “der herre holofernes .
0,715 der uragote des .
0,716 wer dize livt were .
0,717 du sagete ich im z ze ware .
0,718 an aller slahte bosheit .
0,719 daz was in allen uil lait .
0,720 dar umbe hiez er mich gewinnen .
0,721 unde hiez mich da her binden .
0,722 swenn er diz lant erworue .
0,723 daz ich danne uon sinem swerte ersturbe .”
0,724 Duo in geseit achior .
0,725 also er geret hete ze holoferne da beuor .
0,726 du uielen si alle an ir chnie .
0,727 an got dingeten si ie .
0,728 si begunden algemeine .
0,729 chlagen un- wainen .
0,730 mit chlagelicher stimme
0,731 si baten in ir not geringen .
0,732 wande er waere uil guot .
0,733 si baten in sehen an der heiden ubermuot .
0,734 “unde sich unser diemuot an .
0,735 herre got abraha- .
0,736 du erzaige daz dem gediete .
0,737 daz dv niene lazest uz diner guote .
0,738 swer so dir getruuet .
0,739 unde in dinem gebote buet .
0,740 die sich nicht uerseht war z ir libe .
0,741 die gediemuotes du in einer wile .”
0,742 Duo der tach was ergan .
0,743 un- daz gebet ende gena- .
0,744 du begunden si ze trosten doch .
0,745 achior den herzoch .
0,746 “den got den wir beten an .
0,747 den heiden chunt hast getan .
0,748 der gibet dir die gnade .
0,749 daz du siv e sihest slahen un- uahen .
0,750 e si daz gesehen .
0,751 daz dir dehein lait uon in muge geschehen .
0,752 unde welle uns got die gnade geben .
0,753 daz wir den sich an in genemen .
0,754 so si er doch der heilaere din .
0,755 obe du wellest glovben an in .
0,756 unde dich gecherest an unser leben .
0,757 so schol er dir die gnade geben .”
0,758 du div rede gendeti wart .

0,759 du nam siv der ewart .
0,760 der guote ozias .
0,761 der da der oberiste was .
0,762 heim in daz hus sin .
0,763 duo machte er wirtschaft in .
0,764 allesamt gemeine phafen unde laien .
0,765 daz si sich getrosten .
0,766 nach der clage grozen .
0,767 duo daz muos was ergan .
0,768 so uiengen si daz gebet wider an .
0,769 si gingen wider in daz goteshus .
0,770 si chom du selten dar uz .
0,771 si beten al geliche .
0,772 arme unde riche .
0,773 daz siv got erlost .
0,774 uon solhem untroste .
0,775 Also iz des andern morgens tagete .
0,776 holofernes sich garte .
0,777 er hiez daz her sa .
0,778 uaren uuor bethulia .
0,779 daz sag ich iv ze ware .
0,780 daz der uenden zehencich unde zwaincihc tusent waeren .
0,781 ich sag iv daz ze dute .
0,782 er habete zwai unde zwainzich tusent garwer livte .
0,783 ane die die er hete geuangen .
0,784 di si worten uz den landen .
0,785 si garten sich alle geliche .
0,786 si wolden die stat riche .
0,787 sa gewinnen .
0,788 an ir widerwinnen .
0,789 si ilten an den berch sa .
0,790 hin ze der stete div da heizet bethulia .
0,791 an den hohen bergen .
0,792 begunden si herbergen .
0,793 si slugen uz ir gezelt .
0,794 si beuiengen einen hohen berch .
0,795 unze hin ze dothaim uuor die burch .
0,796 an der andern siten .
0,797 lach daz her witen .
0,798 uon belma heizet ein stat .
0,799 unze an den berch chelmon der engegen esdrelon stat .
0,800 Sa n allen gahen .
0,801 du die israhelischen livte daz er gesehen .
0,802 duo uielen si nider ze der erde .
0,803 si betten an got uil werde .
0,804 mit wenen waren si gewasken .
0,805 si saeten uf ir hovbet den asken .
0,806 si betten alle mit einem muote .

0,807 daz siv got beschirmote .
0,808 durch sine gvote .
0,809 si namen ir wichgeserwe .
0,810 si besazten die uesten berge .
0,811 si werten in die straze .
0,812 si ne wolden in in daz lant meht lazen .
0,813 si ne wolden e nicht gahen .
0,814 unze si uon himele helf gesahen .
0,815 Nu was geherberget div michel herchraft .
0,816 holofernes mit luzel luten der umbereit die stat .
0,817 duo uand er daz wazer .
0,818 daz was oste- dar in geleitet mit listen .
0,819 da mit wolden si di stat uristen .
0,820 duo hiez er sa ilen .
0,821 unde hiez die rinnen sniden .
0,822 und er werte in daz wazzer da .
0,823 dannoch namen si z alswa .
0,824 iz wart in uil ture .
0,825 wan uor der burcmure .
0,826 da waren brunnen uerholne .
0,827 die namen si uerstolne .
0,828 da si sich mit lavten .
0,829 wande si der gnuhcsam ni ne habeten .
0,830 daz sach ich iv entriwen .
0,831 uon durste habeten du uil sere den tot .
0,832 Moab un- ammonite .
0,833 die sint in div nachisten livte .
0,834 den was ir geuerte wol chunt .
0,835 die giengen zu holoferne an der selben stunt .
0,836 si sageten im des israheliskien livtes site .
0,837 si sprachen “herre si ne uehtent dir an dem uelde nivht mite .
0,838 wan si werent dir die berge .
0,839 unde die uesten burge .
0,840 daz du se ubel gwinnen maht .
0,841 si ne habent dehein ander chraft .
0,842 wellest du siv gwinnen .
0,843 un- an uehte bedwingen .
0,844 holofernes lieber herre .
0,845 so uolge unser lere .
0,846 un- heiz behuoten die brunnen .
0,847 so maht u siv gewinnen .
0,848 ane schilt un-d ane spert .
0,849 swie so din muot gert .
0,850 older si muozen uor durste ersterben .
0,851 older si gebent dir die stat unde entwichent dir uon den bergen .”
0,852 Holoferne un- den uuorsten al .
0,853 den geuil der rat uile wol .
0,854 er scuf huote ze den brunnen .

0,855 daz ir die burgare niene mahten gewinnen .
0,856 ie ze dem brunnen einen uuorsten so getan .
0,857 der zehenzich riter mohte haben .
0,858 alumbe ze den brunnen .
0,859 da lach div stat mitten inne .
0,860 du si also waren bevangen .
0,861 zwainzich tage lange .
0,862 duo begunden n des wazzer zerinne .
0,863 daz si habeten gwnnen .
0,864 uon den cisternen un- uon den brunnen .
0,865 swie man z de- livte gaebe mit maze .
0,866 swaz in sin getrunche un- gaeze .
0,867 doch was uil michel ir not .
0,868 si waren uil nach uor durste alle tot .
0,869 si ilten uir harte .
0,870 ad ozia- ze dem ewarte .
0,871 si reiten al gliche .
0,872 arme un- riche .
0,873 beidev chint unde wip .
0,874 “got rihte iz uber dinen lip .
0,875 daz wir so notliche- leben .
0,876 wan durch dich wir hieten uns den heiden ergeben .
0,877 un- durch die sunde .
0,878 so hat uns got geben in der heiden hende .
0,879 nu ne habe wir der helfe nicht .
0,880 daz wirt den heiden uil lieb .
0,881 daz wir muozen erwerden ersterben .
0,882 unde uon dem durste ersterben .
0,883 Nu samnen uns alle geliche .
0,884 arme unde riche .
0,885 unde chom ze sinen uovzzen .
0,886 daz si uns daz leben lazen .
0,887 bezer ist daz wir got in der uanchnussce dienen .
0,888 danne wir daz leben uor durste uerliesen .
0,889 unde wir ein tiewiz werden .
0,890 allem dem daz lebet uf der erde .
0,891 so wir unserev chint uor unsern ovgen sehen sterben .
0,892 himel unde erde .
0,893 sint des unser urchunde .
0,894 daz iz got hat getan durch unser sunde .
0,895 daz ist uns nu der beste rat .
0,896 daz wir holoferne geben die stat .
0,897 daz wir gahes geuallen uon den swerten .
0,898 danne wir saine uor durste ersterben .”
0,899 unde also div rede ergan was .
0,900 z ware sag ich iv daz .
0,901 si begunden algemeine .
0,902 wofen unde wainen .

0,903 si sprachen alle ensampth .
0,904 “owi herre heilant .
0,905 wir habent gesundet wider dich .
0,906 herre got du erhore unsich .
0,907 herre wir wellen dir sin uergehen .
0,908 wir bitten dich an unser unreht nivht sehen .
0,909 wande du bist herre uil govt .
0,910 nu hilf uns herre uz dirre uil micheln not .
0,911 un- en gib uns nieht den heiden .
0,912 ze manichualten laiden .
0,913 die din nieht wellent erchennen .
0,914 so spottent si unser denne .
0,915 uns tuot uil we daz spot .
0,916 so sprechent si “wa ist nu ir got .
0,917 der in helfe solde sin .”
0,918 nene erghennent si din .”
0,919 Duo si geruften gnuoge .
0,920 unze si worden muode .
0,921 uf stunt du ozias .
0,922 der ir ewart was .
0,923 mit trurigem muote .
0,924 reite der guote .
0,925 “ir schult ivch urolichenen gehaben .
0,926 unze uber den uuofen tach .
0,927 so chumt uns dev goteschaft .
0,928 unde troestet unser gemuote .
0,929 unde hilfet uns uz dirr note .
0,930 un- genimt den itewiz uon sinem namen .
0,931 daz wir usis sin neimer geschamen .
0,932 unde erloset uns uon der ubermovte .
0,933 der heidenisken diete .
0,934 obe auer inner der urist .
0,935 uns got dehein helfe n ist .
0,936 swenne ueruar daz benante zit .
0,937 so chome danne man un- wip .
0,938 ze dere heiden gnaden .
0,939 ob si uns mit guote wellen enphahen .
0,940 des alle urolichen wolden enbitten .”
0,941 Die selben chlage ein urovwe uernam .
0,942 iudith heizet der ir nam .
0,943 ein uil edel wip .
0,944 scone was der ir lip .
0,945 merari was der ir uaternam .
0,946 manases hiez der ir man .
0,947 er starb in enem snite .
0,948 da er den snitaeren was mite .
0,949 da si daz chorn bunden .
0,950 uon der heizen sunnen .

0,951 durchschein im daz er erstarb .
0,952 du wart er ze bethulia .
0,953 geleit in sines uater grab .
0,954 iudith du uerwitewet was .
0,955 ze ware sag ich iv daz .
0,956 driv iar .
0,957 un- sehs manode gar .
0,958 si hiez in ir huse obene .
0,959 ein chemnaten worchen tovgene .
0,960 div allenthalben besperret was .
0,961 da si mit ir diernen innen saz .
0,962 si trovch haerin gwant an .
0,963 sit manases erstarp ir man .
0,964 si uaste die wochen algemeine .
0,965 unze an den samztach eine .
0,966 un- swenne waren ir hoczit .
0,967 owi wie erlait iz ir schoner lib .
0,968 wande si was al begurwe .
0,969 der schonisten uarwe .
0,970 diu der ie gewan dehein wip .
0,971 doch si niene zierte ir lip .
0,972 si habete richtuom grozen .
0,973 dri ir man habete lazen .
0,974 unde uil eigener livte .
0,975 die habete si uil trute .
0,976 un- tet in uil ze guote .
0,977 sam si waere ir muoter .
0,978 Daz was uil witen mere .
0,979 wie govt wip si waere .
0,980 wande si uil harte .
0,981 den ir schephaere uorhte .
0,982 uon div so ne was dehein ubel mohte gesagen .
0,983 du si uernam daz .
0,984 daz der guote ozias .
0,985 dem livte hete geheizen .
0,986 daz er siv wolde lazen .
0,987 nach dem uivnften tage .
0,988 ub in deheine gnade got niene wolde gesendet haben .
0,989 daz si sich holoferne ergeben .
0,990 unde uristen ir lebe- .
0,991 duo sante si uil drate unde hiez ir gewinnen die ewarte .
0,992 unde also si die briester gesach .
0,993 wie drate si in zuo sprach .
0,994 “waz ist daz wart .
0,995 des ozias dem livte gehenget hat .
0,996 ob er an den uivnften tage .
0,997 uon gote der helfe niene habe .
0,998 daz er die stat welle ergeben .

0,999 unde den livte uristen daz leben .
0,1000 owi wer birt ir .
0,1001 wanne saget ir z mir .
0,1002 daz sin got gervchet .
0,1003 daz ir in uersovchet .
0,1004 daz ir im des habet gesezet ein zil .
0,1005 wenne er iv genaden scul .
0,1006 disu rede en bringet uns dehein govt .
0,1007 wan zornigez muot .
0,1008 uon dem unsern herren .
0,1009 der uns scolde erhoren .
0,1010 Habet ir siner erbarmunge .
0,1011 ein zil uunden .
0,1012 ir unsinnigez uolch .
0,1013 daz uns z ahten niene tovch .
0,1014 wan sundaeren . zimet büezzen
0,1015 un- suchen gnade ze sinen uuozen .
0,1016 unde svchen z im antlaz .
0,1017 wande er unser brode wol weiz .
0,1018 wir ne muogen im nivht erdrön an .
0,1019 sam einem irdisken man .
0,1020 uon div so diemovten wir im unser sele .
0,1021 daz er uns erhore .
0,1022 al nach sinem willen .
0,1023 uns dise not gerovche ze linden .
0,1024 und also wir sin getruobet .
0,1025 uon ir ubermuote .
0,1026 also werde wir durch dine guote .
0,1027 geuruot in unserre diemvotē .
0,1028 wande wir unserre uater unde nivht haben began .
0,1029 daz wir beten vrvomde got an .
0,1030 dar umbe si uon den vienden .
0,1031 wrden erslagen unde zeuovret vil witen .
0,1032 nu ne wizen awer wir got deheinen .
0,1033 niewan in einen .
0,1034 nu biten wir siner guote .
0,1035 wenne er getroste daz unser gemuote .
0,1036 want er uil sicherlichen richet die not .
0,1037 die uns die ubelen heiden tovt .
0,1038 unde gediemuotiget die unsern uiande .
0,1039 uor den unsern handen .
0,1040 unde machet siv an ere .
0,1041 des scul wir getruwen dir trehtin herre .
0,1042 Nu ir lieben herren .
0,1043 die daz livt scult leren .
0,1044 unde den ir sele enpholhen ist .
0,1045 dar an chert ivren list .
0,1046 daz ir in gestetiget ir gemuote .

0,1047 und saget in uor die guote .
0,1048 die got an unsern uorderen begie .
0,1049 wie ofte er in half ie .
0,1050 uz maniger slahte note .
0,1051 da er siv mit besuchte .
0,1052 ob si werlichen geluobten an in .
0,1053 wand er got scolde sin .
0,1054 nu mant siv abrahames .
0,1055 sines undertanes .
0,1056 wie diche er des gerovchte .
0,1057 daz er in besovchte .
0,1058 duo gab er uns ze pilde daz .
0,1059 wande er im lieb was .
0,1060 sam wart uersovchet dar nach .
0,1061 abrahams sun ysaac .
0,1062 unde welt ir gedenchen des .
0,1063 sam wart iacob und moyses .
0,1064 mit noten und mit riwen .
0,1065 wrden si uunden die gotes getriwen .
0,1066 ir wizzet wol daz auer die .
0,1067 die er ane bechorunge lie .
0,1068 die der zuo niene wolden gedultich sin .
0,1069 unde in ir note- myrmeloten wider in .
0,1070 die muosen erwerden .
0,1071 un- boslichen ersterben .
0,1072 da schul wir nemen bilde bi .
0,1073 unde glovben daz iz uon unsern sunden chomen si .
0,1074 dar umbe er uns uon rehte .
0,1075 wil zuhtigen sam sine chenehte .
0,1076 unt uns erlosen .
0,1077 er ne wil uns nivht uerliesen .”
0,1078 Duo sprach der guote ozias .
0,1079 der da der oberiste was .
0,1080 und elliv der iuden phafheit .
0,1081 si hiete in die warheit geseit .
0,1082 si baten alle die gotes div .
0,1083 daz si bette umbe siv .
0,1084 wande si ein heiligez wib was .
0,1085 si erhorte got deste baz .
0,1086 duo ensprach iz auer ivdith div scone .
0,1087 “nu wizzet daz ze ware .
0,1088 daz daz uon minem sinne niene uert .
0,1089 daz ich z iv da han gereit .
0,1090 sam chunt daz also uil .
0,1091 uone mir daz ich nu tuon wil .
0,1092 des tuot ir herren wol war .
0,1093 ub iz uon gote uar .
0,1094 so bittet in siner govte .

0,1095 daz er gechreftige min gemuote .
0,1096 unde stet ze den tor noch sa .
0,1097 swenne ich dar uz ge mit miner abra .”
0,1098 so hiez daz ir chamerwip .
0,1099 si bat siv warten der zit .
0,1100 “unde bittet got den gvoten .
0,1101 daz er uz disen noten erlose in disen uunf tagen .
0,1102 also ir daz zit habet gegeben .
0,1103 ir ne schult mich auer nivhtes fragen .
0,1104 daz wil ich iv sagen .
0,1105 war iwer gebete si enzechlich .
0,1106 hin ze unserm herren umbe mich .”
0,1107 dov sprach der govte ozias .
0,1108 der der iuden uurste was .
0,1109 “nu uar mit uride .
0,1110 unser herre si dir mite .
0,1111 unde erlose uns uon unsern ureisen .”
0,1112 da mit begunden si sich scheiden .
0,1113 Dov die herren chomen alle uz .
0,1114 div urovwe gie in ir betehus .
0,1115 ir gebete daz was uil groz .
0,1116 mit den zeheren si sich begoz .
0,1117 si besaete sich mit dem stovbe .
0,1118 mit grozen riwen bette div urovwe .
0,1119 daz er durch sine govte .
0,1120 si geruochte ze behuoten .
0,1121 “wand dehein got ist ane dich .
0,1122 herre got nu erhore mich .”
0,1123 dv si du erwant uon dem gebete .
0,1124 ich sage iv was si dov tete .
0,1125 si uorderot ir div sa .
0,1126 div da heizet abra .
0,1127 in ir hus si dov gie .
0,1128 ir witewelich gwant si da uerlie .
0,1129 unde batte sich dar inne .
0,1130 und hiez ir ir salben bringen .
0,1131 unde salbote sich dov .
0,1132 mit dem allerbesten mirto .
0,1133 daz der ie iemen mohte gesehen .
0,1134 so wir daz buoch horen iehen .
0,1135 unde leit ir brutgwant ane .
0,1136 daz was mit golde wol beslagen .
0,1137 unde stralte ir uahs .
0,1138 unde want in enine sidine huben daz .
0,1139 unde leit ir bestez gewant an .
0,1140 dov was si uil wolgetan .
0,1141 dov leit an div urovwe .
0,1142 ir guldine armbovge .

0,1143 unde nam ovch ir halsgolt .
0,1144 man mohte ir gerne wesen holt .
0,1145 du hiench si in die oren .
0,1146 die guldinen wieren .
0,1147 dov uazete daz scone wip .
0,1148 mit micheler cierde ir lip .
0,1149 ovch waiz min trehten daz .
0,1150 daz si uil wnderenscone was .
0,1151 wand iz ne ur nicht uon ivnchlicher ubermuot .
0,1152 niewan uon ir tugeden uil guot .
0,1153 Div urovwe uil wise .
0,1154 div uazete ir wib mit spise .
0,1155 dov begunden si uaren beide .
0,1156 si wolden zuo den ubelen heiden .
0,1157 duo si zov dem burgitor chomen gegang .
0,1158 da si uant den govten ozia- .
0,1159 er beite ir da ze der borten .
0,1160 mit den ewarten .
0,1161 also div urovwe dar chom .
0,1162 man lie si ane uragen uuor gan .
0,1163 si was so scone unde so lussam .
0,1164 daz siv sin alle wnder na- .
0,1165 du bat er got den govten .
0,1166 daz er si movse behuten .
0,1167 unde gab ir uranspovtliche uirt .
0,1168 daz si movse erledigen ir livt unde ir stat .
0,1169 al nach sinen gnaden .
0,1170 duo sprachen si alle "amen ." .
0,1171 Ivdith div wise .
0,1172 div bat got mit ulize .
0,1173 daz er ir ein engel gaebe .
0,1174 der ir geleite were .
0,1175 si cherte sa uon der burge .
0,1176 ze tal an dem berge .
0,1177 da geuiengen sie die wartman .
0,1178 die uon dem her waren gegang .
0,1179 daz was des morgens uil urov .
0,1180 si uragcten si du .
0,1181 uon wanne si uovre .
0,1182 obe si ware der burgaere .
0,1183 oder war si wolde .
0,1184 daz si in daz sagen solde .
0,1185 des antwrte in du sciene .
0,1186 ivdith div maere .
0,1187 "ich wil iv sagen ze ware .
0,1188 ich bin der burgaere .
0,1189 unde bin durch daz geulohen dan .
0,1190 wand ich daz uernome- han .

0,1191 daz ir wip unde ir chint .
0,1192 in ivren gewalt gegeben sint .
0,1193 dar umbe daz si in daz liezen uersmahen .
0,1194 daz si ivch nivht uridelichen wold enphahen .
0,1195 dov gedaht ich mir ze ware .
0,1196 daz mir bezer were .
0,1197 daz ich mich ergaebe .
0,1198 ob er so govt ware .
0,1199 daz er mir gehieze .
0,1200 daz er mir den lip lieze .
0,1201 ovch wil ich ivren herren .
0,1202 uil gerne leren .
0,1203 wie er die stat erwerbe .
0,1204 daz ivrer deheiner niemer dar umbe ersterbe .”
0,1205 Dov die heiden ir rede gehorten .
0,1206 uil urolichen si sie danne uovrten .
0,1207 si sahen si ainchlichen an .
0,1208 si duhte siv so wolgetan .
0,1209 daz siv ir scone wnder nam .
0,1210 dov sprahen z ir die wartman .
0,1211 “du hast uil wislichen getan .
0,1212 daz tu dich unserem herren wil ergeben .
0,1213 unde uristen daz din leben .
0,1214 nu wizest daz ze ware .
0,1215 so dich gesihet unser herre .
0,1216 daz er minnet dinen lip .
0,1217 wande du bist ein scone wip .”
0,1218 si uurten sie drate uber uelt .
0,1219 hin z ir herren gezelt .
0,1220 dov si chomen uovr holofernem den herren .
0,1221 er enphiench siv mit eren .
0,1222 dov begunde er sa brinnen .
0,1223 nach ir edelen minnen .
0,1224 dov sie sine riter gesahen .
0,1225 si sprachen wem daz ebreiske livt solde uersmahen .
0,1226 er ne sazte n urtaile sinen lip .
0,1227 umbe so wnderensconiv wip .
0,1228 si sprachen si solden mit allem rehte .
0,1229 mit in dar umbe uehten .
0,1230 Dov ivdiht gesach daz .
0,1231 wa der herre holofernes da saz .
0,1232 mit phelle behangen .
0,1233 mit golde wol beslagenen .
0,1234 un- mit edelen gesteinen .
0,1235 grozen unde chlainen .
0,1236 smargdine unde saffire .
0,1237 die lagen in dem edelen gesmide .
0,1238 si uiel im ce uovzen drate .

0,1239 unde dingete in sine gnade .
0,1240 si bette an in .
0,1241 sam er z got solde sin .
0,1242 er hiez die sinen chnehte werde .
0,1243 die urovwen heuen uon der erde .
0,1244 er sprach “urovwe nu habe senftez movt .
0,1245 wande dir niemen nieht en tovt .
0,1246 ich ne wart niemanne ze schaden .
0,1247 der sich ce dem chunige nabuchodonosor wolde gehaben .
0,1248 unde ne hiete sich din livt nieht uergahet .
0,1249 unde ne heite minen herren nieht uersmahet .
0,1250 unde hieten mich uridelichen enphangen .
0,1251 daz ne waere nivht groze an ir schaden gegangen .
0,1252 ich hiete daz gerne uon dir uernomen .
0,1253 war umbe du her z uns sist chom .”
0,1254 Dov sprach ivdiht div scone .
0,1255 “nu uernim min lieber herre .
0,1256 wande des chuniges nabuchodonosors ere an dir stat .
0,1257 unde niemen so urumen hat .
0,1258 nu uernim herre miniv wart .
0,1259 du hast beduungen elliv div lant .
0,1260 in sinen gwalt .
0,1261 im ne dient div livte nivht eine .
0,1262 div tyerer algemeine .
0,1263 di movzen im diensthaft sin .
0,1264 daz uert allez uon der urvmicheit din .
0,1265 din zuht unde din gwalt .
0,1266 ist chunt uber elliv div lant .
0,1267 daz n ist ovch nivht unuerdait .
0,1268 daz ist ovch gewizen .
0,1269 daz im dar umbe hast geheizen .
0,1270 doch iz dir herre waere lait .
0,1271 er saite dir die warheit . er saite dir die warheit .
0,1272 ich wil dir herre auer daz chunden .
0,1273 unser got ist so erbalget uon den sunden .
0,1274 daz er di sinen wissagen in chunt hat getan .
0,1275 daz er se durch ir missetat welle uerlan .
0,1276 wande si daz habent uernomen .
0,1277 so ist din uorhte uber siv chomen .
0,1278 wande du hast siv beduungen .
0,1279 mit durste un- mit hunger .
0,1280 uon sogetanen noten .
0,1281 sint si iezu gehabet under den toten .
0,1282 iz ist in chomen an die not .
0,1283 daz si movzen trichen des uihes plovt .
0,1284 unde daz heilige prot .
0,1285 daz in got uerbot .
0,1286 daz movzen si nu ezzen .

0,1287 dar umbe hat er ir uergezzen .
0,1288 daz ne solte niemer geruoren dehein hant .
0,1289 niewan ir ewart .
0,1290 unde also ich daz erchante .
0,1291 dov was iz mir ante .
0,1292 dov gedahte ich mir .
0,1293 ich wolde iz chunden dir .
0,1294 unde begunde n allen gahen .
0,1295 her zuo dir ulihen .
0,1296 herre ich gere daz daz si din urlovb .
0,1297 daz ich movze beten an minen got .
0,1298 daz er mir daz chunde .
0,1299 wende er siv umbe ir sunde .
0,1300 zuhtigen welle .
0,1301 daz ich dir daz chunde denne .
0,1302 ich uovre dich durch allez daz lant .
0,1303 un- gib iz herre in dinen gwalt .
0,1304 un- uovre dich in die stat ze ierusale- .
0,1305 daz si dir niene mugen widersten .
0,1306 daz wart uon gote geboten mir .
0,1307 daz ich daz movz sagen dir .”
0,1308 Div rede geuil wol den herren .
0,1309 die mit holoferne waren .
0,1310 si begunden ir waste war ze tuon .
0,1311 uon wanne si habete den wistovm .
0,1312 des nam siv michel wnder .
0,1313 si reiten albesunder .
0,1314 daz si uz der erde niender ne wnde .
0,1315 dehein wip so scone noch so wol redenunde .
0,1316 holofernes . sprah ze der urovwen .
0,1317 wande si wol geuil sinen ovgen .
0,1318 “got hat wol getan an dir .
0,1319 daz er dich hat gesendet her ce mir .
0,1320 uon dem livte din .
0,1321 die mir widerbruhtich wellent sin .
0,1322 daz du se gebest in minen gwalt .
0,1323 unde offenest mir div ir lant .
0,1324 unde getovt din got durch dich .
0,1325 so uil govtes wider mich .
0,1326 so wirt er ovch der got min .
0,1327 unde wil ich dir iemer holt sin .
0,1328 uor dem chunige nabuchodonosor wirst du naemelich .
0,1329 uf aller der erde wirt din name chundich .”
0,1330 Dov div rede was ergan .
0,1331 er hiez die urovwen in eine chemnaten gan .
0,1332 da sin schaz inne lach .
0,1333 bagao hiez der der chamere da phlach .
0,1334 da hiez er sie wesen inne .

0,1335 unde scuf mit dem ingesinde .
0,1336 daz si ir wol waeren diensthaft .
0,1337 uon der siner wirtschaft .
0,1338 dov sprach iudith div scone .
0,1339 “neine min lieber herre .
0,1340 ich ne getorste sin niemer enbizen .
0,1341 iz wovrde mir uil sere uon gote uerwizzen .
0,1342 ich han mir z sin herre uor bedaht .
0,1343 unde han mich sin herre i braht .”
0,1344 duo sprach der herre holofernes .
0,1345 “waz tovn wir dir so dir nu gebristet des .”
0,1346 dov sprach iudiht div mere .
0,1347 “ich sage dir z ce ware .
0,1348 daz ich iz ee nivht uerbiderbet han .
0,1349 unz min wille ist ergan .”
0,1350 sie namen dov sine chnehte drate .
0,1351 un- uovrten si zov der chemnaten .
0,1352 e si gecherte uon dem herren .
0,1353 e bat si in siner gnaden .
0,1354 daz taz were sin urlovb .
0,1355 daz si die drie naht movse uz gan unde beten an ir got .
0,1356 “ich unde min chamerwip” sprach iudith div scone .
0,1357 “wir chomn her wider uor tages uil lieber herre .”
0,1358 Dov gebot er den chamraeren .
0,1359 die der urovwen phlagen .
0,1360 daz si uz gienge .
0,1361 swell ente ir geuiele .
0,1362 unde bette an in got .
0,1363 des hiete driege naht urlovp .
0,1364 also ir daz urlovb gegeben wart .
0,1365 sa ce naht hovb si sich an die uart .
0,1366 unde giench uf an den berch .
0,1367 ce bethulia uovr die burch .
0,1368 unde bate sich in dem brunnen .
0,1369 der den burgaeren da was an gewnnen .
0,1370 si bat got mit ulize .
0,1371 daz er sie underwiste .
0,1372 wie er wolde .
0,1373 daz si ir livt erlosen solde .
0,1374 unde daz er ir helfe ware .
0,1375 so wrden si erloset uil schiere .
0,1376 sie gie ane sorgen .
0,1377 des morgens wider zu den herbergen .
0,1378 da was div urovwe mit zuhten .
0,1379 unze si des nahtes wolde enbizen .
0,1380 Nu was ergangen der drite tach .
0,1381 und was chom der uierde dar nach .
0,1382 holofernes der herre .

0,1383 der machte eine wirtschafft mere .
0,1384 allen sinen holden .
0,1385 die im dienen solden .
0,1386 du sprach er ze sinem chameraere also .
0,1387 der was geheizen bagao .
0,1388 “nu gench encit .
0,1389 unde schunte daz ebreiske wip .
0,1390 daz si des gehenge dir .
0,1391 daz si des gelige bi mir .
0,1392 daz ware ein michel schande .
0,1393 in unserm lande .
0,1394 daz ein wip bespote dar umbe einen man .
0,1395 daz si so uergebene solde uon im uaren .”
0,1396 dov giench dar in bagao .
0,1397 un- sprach ce iudiht also .
0,1398 “urovwe nu ne habet des deheine schame .
0,1399 ir schul uovr minen herren gan .
0,1400 daz ir werdet gemeret .
0,1401 unde ovch trinchet mit im unde ezzet .
0,1402 daz ir iwer uergezzet .”
0,1403 Iudith div antwovrte dov .
0,1404 dem chamraere also .
0,1405 “wie getorste ich da wider sin .
0,1406 daz mir gebute der herre min .
0,1407 also er mir gebutet .
0,1408 so uil ich iemer sin .”
0,1409 dov uazte si sich mit ere .
0,1410 unde gie uovr holoferne- den herren .
0,1411 dov enchuhte sich sin gemovte .
0,1412 uon der urovwen govte .
0,1413 er begunde harte brinnen .
0,1414 uon ir edelen minnen .
0,1415 er sprach “nu trinch urolichen an disen stunden .
0,1416 wande du gnade hi ce mir habest uunden .”
0,1417 dov sprach ivdith div scone .
0,1418 “ich trinche gerne herre .
0,1419 wande ich geurovt bin . mere denne allen den lip min .”
0,1420 dov tranch div urovwe unde az .
0,1421 daz ir uor diwe gegarwet was .
0,1422 er wart des sconen wibes also uro .
0,1423 daz er mere ertranch dov .
0,1424 in mete iovch en wine .
0,1425 danne er deheines tages ie getrunche ce sine- libe .
0,1426 Nu was iz warden spate .
0,1427 die chnehte waren drate .
0,1428 gegangen ce herbergen .
0,1429 si habeten lucel sorgen .
0,1430 si waren trunchen uon trinchen unde uon ezzen .

0,1431 der chameraere . ne hete ovch des nicht uergezzen .
0,1432 er ne hiete gesperret die chemnaten .
0,1433 unde was er gegán slafen .
0,1434 ivdiht div scone .
0,1435 div was in der chemnaten urone .
0,1436 holofernes der herre .
0,1437 der was ce ware .
0,1438 entslafen an dem bette sin .
0,1439 wande er habete getrunchen uil micheln win .
0,1440 dov gebot iudiht ir wibe .
0,1441 bi ir selber libe .
0,1442 daz si uor der chemnaten stovnte .
0,1443 un- ir die tvr behielte .
0,1444 div urovwe sovnt uor dem bette .
0,1445 uil uaste si got ane pette .
0,1446 daz er durch sine govte .
0,1447 gestarchte ir gemovte .
0,1448 daz si ir livt movse erlosen .
0,1449 uon den heiden bosen .
0,1450 Dov des du gebat div urovwe uil tivre .
0,1451 do trat si zov der sule .
0,1452 div ce sinen hovbten stuont .
0,1453 da nam si sin spert .
0,1454 dem herren al ce leide .
0,1455 ich sage iv daz ce ware .
0,1456 si uie in bi dem hare .
0,1457 unde sluch im also geburche .
0,1458 daz hovbet uon dem buche .
0,1459 do ir also wol gelanch .
0,1460 dov nam si uon den sulen den umbehanch .
0,1461 unde gie uil drate .
0,1462 uz der chemnaten .
0,1463 si wolde iz ir divwe geben .
0,1464 un- hiez si ez in ir tasken legen .
0,1465 danne giengen si beide an geleite .
0,1466 nach der erorn gwonheite .
0,1467 sam si wolden gan an ir gebete .
0,1468 si ilten uil drate zuo der stete .
0,1469 nu waren si durch daz her gegán .
0,1470 daz si sahen die stat ane .
0,1471 nu waren si uber die graben gan .
0,1472 dov sahen si die wahtare an den zinnen stan .
0,1473 si begunde in sanfte ce rovfen .
0,1474 unde hiez ir die porte entsliezen .
0,1475 daz si sie dar in liezen .
0,1476 wande got mit ir ware .
0,1477 der habete in gegeben gnade .
0,1478 Dov die wahtare uernamen daz .

0,1479 daz div urovwe chomen was .
0,1480 si ilten uil harte .
0,1481 unde sageten den ewarten dov chomen algemeine .
0,1482 michel un- chleine .
0,1483 die in der stete waren .
0,1484 daz si sie gesaehen .
0,1485 wande si en trueten ir chunste nicht .
0,1486 si brahten dar manich prinnundez licht .
0,1487 c einem ringe si sie umbegaben .
0,1488 wande si se alle gerne sahen .
0,1489 ivdith div scone .
0,1490 div trat uf eine hohe .
0,1491 daz si se alle ubersach .
0,1492 daz wart si gotlichen sprach .
0,1493 “nu lobet unsern herren .
0,1494 der die nie uerlie .
0,1495 die im getruweten ie .
0,1496 unde ovch nu an siner diwe .
0,1497 hat erceiget sin erbarmunge .
0,1498 durch sines livtes riwe .
0,1499 un- hat erslagen mit miner hant .
0,1500 hintan dirre naht sines livtes uiant .”
0,1501 dov zaicte si in uil gwis .
0,1502 daz hovbet holofernis .
0,1503 “nu sehet ivres uiandes hovbet .
0,1504 wie in got hat getovbet .
0,1505 dize ist daz umbehanch .
0,1506 da er in siner trunchenheit under lach .
0,1507 er hat ovch durch sine govte .
0,1508 mich uil wol behovtet .
0,1509 daz ih mit deheinen sunden .
0,1510 bewollen bin .
0,1511 daz ich dar unde danne geuaren bin .
0,1512 unde da gewesen bin .”
0,1513 Dov lobeten sie div lute ze ware .
0,1514 un- sageten ir michel gnade .
0,1515 daz sich got durch sie gerovhte z erbarmen .
0,1516 uber siv uil armen .
0,1517 do sprach der guvte ozias .
0,1518 der der ivden uurste was .
0,1519 “gesegenet sis tu uber elliv wip .
0,1520 salich si der din lip .
0,1521 gesegenet si got der govte .
0,1522 der daz din gemovte .
0,1523 an unsern uint gerihtet hat .
0,1524 daz tu uns die rache hast braht .
0,1525 un- dinen namen hat gemeret .
0,1526 un- hat dich da mit geret .

0,1527 wande du nien entlibe .
0,1528 dinem bloden libe .
0,1529 du ne giengest in den tot .
0,1530 durch unser aller not .
0,1531 des scol dir got gnaden .”
0,1532 dov sprachen si alle “aMEN .”
0,1533 Sa dov chom der heiden achior .
0,1534 der iv benennet ist da beuor .
0,1535 dov sprach div urovwe z im .
0,1536 “herre achior nu uernim .
0,1537 got dem du hast urchunde geben .
0,1538 daz er uon sinen uinden die rache neme .
0,1539 der hat hint der heiden hovbet geslagen abe .
0,1540 mit miner hant daz han ich da her getragen .
0,1541 unde daz du bewaerest minen list .
0,1542 nu sich wa holofernis hovbet ist .
0,1543 der in siner ubermovte .
0,1544 uersmahte unsers gotes govte .
0,1545 unde dir drote danne .
0,1546 so daz israheliske livt worde geuangen .”
0,1547 dov achior daz hovbet gesach .
0,1548 michels wnders er dov iach .
0,1549 ze der erde begund er sicen .
0,1550 uon angesten begund er hichen .
0,1551 wande in des michel wnder nam .
0,1552 daz got mit einem wibe hete sogetan wnder began .
0,1553 daz si einen so chreftigen man .
0,1554 mit sinen eigenem swerte getorste erslahen .
0,1555 dov achior der heideneske man .
0,1556 wider denchen began .
0,1557 do bot er sich so sovze .
0,1558 der urovwen zu den uovzen .
0,1559 “gesegenet sis tu uber elliv wip .
0,1560 wande du hast geuristet uns den lip .
0,1561 uon dem chrimigen tode .
0,1562 des lone dir got mit sinem lone .
0,1563 swa man dinen namen iemer gehoret .
0,1564 da wirt din lop gemeret .”
0,1565 Dov sprach iudith ce den herren .
0,1566 “nu uernemt mir noch mere .
0,1567 nu stechet daz hovbet .
0,1568 uf die mure obene .
0,1569 unze iz beginne uf ga .
0,1570 so weset alle bereit sa .
0,1571 mit ivrem wichgewefne .
0,1572 unde heizet iv di burch entsliezen .
0,1573 unde uart dar uz mit einer chrefte .
0,1574 uil uaste uovr ivch die rihte .

0,1575 unde ne scult newedernthalben cheren .
0,1576 so movzen die wartman ulihen zu ir herren .
0,1577 daz si in wechen .
0,1578 un- sich ze der uehte machen .
0,1579 so ir danne chomt uf daz uelt .
0,1580 so choment die uovrsten uovr des herren gecelt .
0,1581 unde uindent in toten ligen in sinem blovte .
0,1582 so movzen si uerliesen daz dege-liche gemovte .
0,1583 so werfent si daz wichgestvefen uon der hant .
0,1584 un- rument si uliehunde daz lant .
0,1585 also ir siv sehet ulihen .
0,1586 so schult ir in uaste zov zihen .
0,1587 nu merchet daz helde uil balt .
0,1588 so git siv got in ivren gwalt .
0,1589 so werdent si iv cetreten under die uovze .
0,1590 die unzuht movzen si danne bovzen .”
0,1591 dov achior sach daz gotes wnder da .
0,1592 du gelovbt er sich der heidenschefte sa .
0,1593 unde glovbet ane got .
0,1594 unde eruollete daz sin gebot .
0,1595 unde besneit sich ze der hute .
0,1596 unde habete sich ce dem israhelischen livte .
0,1597 unde elliv sin afterchumft .
0,1598 was mit den ivden iemer unze an dise stunt .
0,1599 Unde also man daz ersach .
0,1600 daz der tach uf prach .
0,1601 dov waren si alle geruwe .
0,1602 in ir wichgeseruwe .
0,1603 daz hovbet wart gestechet sa .
0,1604 uf die burchmure ce bethulia .
0,1605 si uovren mit einem micheln schalle .
0,1606 si waren wol gar alle .
0,1607 in die halsperge .
0,1608 si ilten abe dem berge .
0,1609 du die wartman daz gesahen .
0,1610 si begunden harte ce gahen .
0,1611 abe der warte uber daz uelt .
0,1612 hin ce ir herren gecelt .
0,1613 dov die gesahen .
0,1614 die da ce houe waren .
0,1615 si ne getrosten nivht gewechen .
0,1616 holofernem ir herren .
0,1617 wan daz si reiten unde traten .
0,1618 uile uaste uor der chemnaten .
0,1619 obe si in da mite mohten erwechen .
0,1620 niemen getorste z im nivht gesprechen .
0,1621 noch die chemnaten uf getovn .
0,1622 noch mit chlophen erwechen .

0,1623 unze daz chomen die uovrsten .
0,1624 die in wechen getorsten .
0,1625 herzogen un- grauen .
0,1626 die mit im da waren .
0,1627 die hiezen die chameraere .
0,1628 wechen den herren .
0,1629 wande die muse weren .
0,1630 uz ir holren gegan .
0,1631 unde wolden siv uechten an .
0,1632 bagao der chameraere .
0,1633 der gie in die chamnaten wechen sinen herren .
0,1634 uor dem umbehangen er gestuont .
0,1635 die hente er uaste zesamne sluoch .
0,1636 er wante dannoch ce ware .
0,1637 daz er bi der urovwen enslafen waere .
0,1638 du er dov daz erhorte .
0,1639 daz er sich niender en ruorte .
0,1640 do gie er zu dem bette baz .
0,1641 unde ersach daz .
0,1642 daz der botich ane daz hovbet da was .
0,1643 bewollen in dem blovte .
0,1644 dov erchom er note .
0,1645 du begunde er lute ze scrien .
0,1646 unde daz gwant uor leide ab im ce sniden .
0,1647 dov gie er in dem gecelt allenthalben .
0,1648 unde schuchte die urovwen .
0,1649 also er der urovwen niene uant da .
0,1650 du gie er uz dem gecelt sa .
0,1651 er sprach "o widerwende .
0,1652 die ein wip hat began in des chuniges nabuchodonosors lande .
0,1653 si hat minen herren holoferne- erslagen .
0,1654 unde hat sin hovbet hin getragen .
0,1655 er lit an der erde .
0,1656 in dem blovte bewollen unwerde ."
0,1657 Dov die uovrsten uernamen daz .
0,1658 daz holofernes erslagen was .
0,1659 michel wart ir chlage .
0,1660 si begunden in uovrhten sere .
0,1661 ir gemuote wart getrovbet ie mere unde mere .
0,1662 dov daz her al uerna- daz .
0,1663 daz der herre erslagen was .
0,1664 do enphiel in .
0,1665 bediv rat unde sin .
0,1666 si uerzeiten algemeine .
0,1667 uon so grozem laide .
0,1668 si ne gerten helfe decheine .
0,1669 niewan die uluht eine .
0,1670 die uielen si alle an .

0,1671 dem was endanc der da entran .
0,1672 si uluhen alle besunder .
0,1673 ir deheiner ne sprach nie wart ce dem andern .
0,1674 si uluhen alle mit geneictem hovbet .
0,1675 si waren rehte erstovbet .
0,1676 dov ir ieglicher daz ersach .
0,1677 daz in die iuden ilten nach .
0,1678 si liezen gewant unde gezelt .
0,1679 si uluhen berch uelt .
0,1680 swa ir decheiner mohte chomen hin .
0,1681 si uluhen alle ane gesin .
0,1682 dov die burgaere sahen .
0,1683 die heiden so uaste gahen .
0,1684 unde daz sie niene uluhen .
0,1685 io wie s in zov zugen .
0,1686 si bliesen unde rovften uaste nach in .
0,1687 daz benam in harte den gesin .
0,1688 swelher in chom so nahen .
0,1689 daz s in mohten ergahen .
0,1690 der movse uliesen den lip .
0,1691 des siges half im ein wip .
0,1692 die heiden uluhen eincigen dan .
0,1693 der burgare auer deheiner uon dem andern chom .
0,1694 Der govte ozias .
0,1695 der der iuden biscolf was .
0,1696 der sante boten manige .
0,1697 allenthalben after dem lande .
0,1698 ce den steten grozen .
0,1699 unde taten in die rede chunt .
0,1700 si waren gar sa an der stunt .
0,1701 unde iaiten siv uz dem lande .
0,1702 mit scaden ovch mit scanden .
0,1703 daz si der heiden mohten beiagen .
0,1704 die wrden alle erslagen .
0,1705 si rachen uaste ir anden .
0,1706 die auer in der stete waren bestanden .
0,1707 daz ze bethulia .
0,1708 die uielen an den rovb sa .
0,1709 die burgaere wider sunnen .
0,1710 dov si den sic gewnnen .
0,1711 unde siv gesluogen uz dem lante .
0,1712 die chunen wigande .
0,1713 die namen dov allez daz .
0,1714 daz der heidene was .
0,1715 si namen uihes uberal .
0,1716 daz si niemen ne mohte wizen zal .
0,1717 der rovb was so grozlich .
0,1718 daz si alle danne wrden rich .

0,1719 Dov ioachim uraiste daz .
0,1720 der ir ercebiskolf was .
0,1721 dov uovr er sa .
0,1722 uon ierusalem- hin ce bethulia .
0,1723 mit aller siner phafheit .
0,1724 durch daz wander daz in wart gesait .
0,1725 er wolde die urovwen .
0,1726 uil gerne gescovwen .
0,1727 dov iudith chom uovr die herren .
0,1728 si enphien sie mit eren .
0,1729 si sprachen alle gemeine .
0,1730 “gesegenet sis tu eine .
0,1731 uber elliv wip .
0,1732 wande du hast uns geuristet bediv govt unde lip .
0,1733 die wile und stat ierusalem- .
0,1734 so ne scol din lop niemer cegen .
0,1735 du bist ein urovde israhel .
0,1736 du bist des landes ere iemer mere .
0,1737 wande du hast so chnehtlichen getan .
0,1738 daz ne mohte niemer uovrbrat haben dechein man .
0,1739 wande du die chuscheit an dir hiete .
0,1740 dar umbe hete dir div goteschaft gesterchet din gemovte .
0,1741 wande uovr daz manases erstarb eine .
0,1742 so ne gewnne du niemer mere man decheinen .
0,1743 uon div so werdest du gesegenet ewichlichen .
0,1744 daz dir div gotes ceswe niemer geswiche .”
0,1745 die lute die da waren .
0,1746 die sprachen alle “amen .”
0,1747 Si prahten uil chvme cesamne .
0,1748 den rovb inner drizich tagen .
0,1749 du der uil michel hort .
0,1750 aller cesamne braht wart .
0,1751 dov wart daz allez uz gelesen .
0,1752 daz des herren holofernis wol mohte wesen .
0,1753 bediv uihe un- gwant .
0,1754 daz nam div urovwe z ir hant .
0,1755 man gab ir silber unde golt .
0,1756 ir waren div livte uil holt .
0,1757 ir wart gegeben allez daz .
0,1758 daz des herren holofernis was .
0,1759 si rovften alle geliche .
0,1760 arme unde riche .
0,1761 bediv wip unde man .
0,1762 den ir schephere an .
0,1763 alte unde iunge .
0,1764 got si lop sungen .
0,1765 daz er siv gerovchte c erlosen .
0,1766 uon den heiden bosen .

0,1767 ivdith div urovwe .
0,1768 div sanch ovch entriwe .
0,1769 lop ir herren .
0,1770 daz er gerovchte sine div so groze c eren .
0,1771 Dov daz lop gesungen wart .
0,1772 daz livt chom algemeine ce ierusalem in die stat .
0,1773 nach der sigenunft meren .
0,1774 betten an ir herren .
0,1775 unde also si geluteret worden des tages .
0,1776 dov brahten si ir obfer unde ir antheiz .
0,1777 ivdith div brahte dar begaruwe .
0,1778 allez daz wichgeseruwe .
0,1779 daz des herren holofernis was .
0,1780 un- opherote daz .
0,1781 daz habete ir daz livt gegeben .
0,1782 wande si in uriste daz leben .
0,1783 unde daz dechlachen daz si danne trovch .
0,1784 da si im daz hovbet abe slovch .
0,1785 daz habete si genomene .
0,1786 c eine- ulovche der uergezenunge .
0,1787 daz livt daz was urolich .
0,1788 in got dienste wan ich .
0,1789 drie manode uolle .
0,1790 tulten si mit urovdn die sigenunft alle .
0,1791 dov die tulttage alle chomen uz .
0,1792 dov uovr mannichlich heim ce sinem hus .
0,1793 ivdith div uovr sa .
0,1794 hine heim ce bethulia .
0,1795 da was div urovwe here .
0,1796 mit eren iemer mere .
0,1797 daz si div oberiste was an den eren .
0,1798 uor allen den die in iudea waren .
0,1799 Div urovwe was iemer mere ane man .
0,1800 daz si deheinen z ir lebene gewan .
0,1801 uovr daz manases erstarb ir man .
0,1802 swenne ir hochzit waren .
0,1803 so gie si gar mit michlen eren .
0,1804 div urovwe wonte alsus .
0,1805 uunf un- cehencich iar in ir hus .
0,1806 du lie si ir abram urie .
0,1807 daz habete si wol uerdienet umb sie .
0,1808 dov starb div urovwe sa .
0,1809 man leite sie zu ir manne in bethulia .
0,1810 dov chlagetn sie livte alle .
0,1811 aht tage uolle .
0,1812 in aller der wile .
0,1813 unde div urovwe was enlibe .
0,1814 so stovnt daz lant uridelichen ce ware .

0,1815 und ovch nach ir tote ce uil mannodo .